

րովին սպիտակահեր ծերունի մ'է, որ շատ պատկառելի քալուածք մ'ունի...» (12):

Կաթողիկոս օծուելէ ետք, հարկ էր ստանալ Շահին արտօնագիրը: Ուստի Յակոբ Զուղայեցի իսպահան կ'երթայ Շահ Աբաս Բ.ի մօտ: Նախ կը տեսնէ իշխանաց իշխանը, զոր էհտիմալ—Դուլուաթ կը կոչեն, և անոր կը յայտնէ իր խորհուրդը: Իշխանը կ'ըսէ. «Երբ քեզի իմացնեմ, կուգաս»: Կաթողիկոսը կ'երթայ և կը պատրաստէ պատշաճ աղերսագիր մը և 300 ոսկիի նուէր մը, իր նախորդներուն սովորութեան համաձայն. կը գրէ նաև ուղերձ մը: Զորեքշաբթի օր մը կը հրաւիրուի թագաւորին ունկնդրութեան, և անոր կը ներկայացնէ իր աղերսագիրը: Ըստ վկայութեան Զաքարիա Սարկաւագին, հետեւեալ խօսակցութիւնը տեղի կ'ունենայ Շահին և Կաթողիկոսին միջև:

Արեւան. — Դուն տաճի՞կ ես՝ թէ կռապաշտ:

Կաթողիկոսը. — Աստուած մի՛ արասցէ. կռապաշտ չեմ. սակայն տաճի՞կ ալ չեմ:

— Ապա ի՞նչ ես:

— Քրիստոնեայ եմ:

— Դուք Քրիստոսի մասին ի՞նչ կ'ըսէք:

— Ինչ որ գրած են մարգարէները,